



韓亦倫

「O. K., 得嘞, 我一定盡快搞掂, 你放心啦, 我幾時滾過你呀?」

「唔×化!」CHARLES 一放下電話, 便在心裏咒罵起來。還未夠九點半, 便囉囉囀囀在催這催那, 前世欠了他那樣。

「HELEN,」他匆忙拿了那個輕飄飄的公事包, 行到大老板的女秘書的跟前, 「嘩! 今日扮得咁靚呀? 約咗BOYFRIEND 放工去梳乎?」

「梳鬼梳馬咩, 今晚表姐結婚, 有得飲。」

表姐? 表妹吧了? CHARLES 心裏想, 這個女人有難了, 未夠三張也起碼二條八, 重扮成咁嘅純情款, 唉……

「喂, 有件事想搵你帮手。」

「又有七嘢關照?」

「呢, WATSONS 果邊亞 SIMON 呢, 成日催我地交 QUOTATION 俾佢, 真無佢修, 你可唔可以同我求其影幾張 COPY 俾佢, 等佢咪日日煩住我?」

「易過借火啦!」同時展示起十分有人情味的笑容。

「HA! 唔該晒, 下次飲茶, 我嘅!」

「係真至好。」那笑容更變得燦爛起來。

「當然真啦! 我現在出去見客。」

莫非呢條女對我有意, CHARLES 一路行入電梯一路想, 幾乎打起冷震來。

「挑, 遲唔遲D呀? 係公司扮動力, 博升呀?」

CHARLES 一上到樓, 亞倫, PAUL 和李仔已經枕住將四方枱, 異口同聲地向他指責。

「車, 我邊有你地咁好景呀, 大老板成日釘住我, 係唔係都要扮吓嘢嘛, 我唔想博炒就真。」

「有七事留番拜山至講, 口水多過茶, 開波啦!」

「係囉, 開波, 開波!」

這個僅得百平方呎左右的小廳子裏立刻便噴湧出一輪興奮的碰撞聲響。

這層樓是亞倫和他哥哥兩夫婦同住的, 一星期大約有兩三朝被徵用來作為這幾個營業主任竹戰之用。有時為了改變口味, 他們亦會移師到鑽石隔鄰的聯誼會或者李仔尖沙咀的架步處來手談。

「佢老母, 今日真係黑, 頂佢個肺, 做雞都無機會!」

PAUL 是魚腩, 又是粗口王, 通常最多聲氣。

「挑, 一個月搵成萬銀, 濕濕碎碎啲亞 PAUL, 益吓兄弟好過益個幾條大奶妹了。」

「噏! 呢度就有成萬嘞!」

「哈! 一萬, 堅晒! 對唔住, 清一色雙辣。」

「×佢老母……。」

又奮起一股略帶憤怒的格角聲響。

八圈過後, 四個人便齊齊落京華地窖吃午飯。人客擠迫到不得了, 但亞倫和部長很熟, 一早留了枱。剛坐下, 亞 PAUL 就對 CHARLES 打了下眼色, 細細聲說:

「果邊個條友仔唔係施德靈條串友 DAVID TSE?」

「係啦,」CHARLES 側頭一看, 「咁嘅款重有係邊個!」

CHARLES 以前在亞 PAUL 間公司做 MARKETING, 同 DAVID TSE 爭過客仔, 他人面夠, 大部份顧客被他搶了去, 令到 CHARLES 和亞 PAUL 被老板大罵一頓, CHARLES 更被迫辭職, 轉過去先靈。

「遲早整錢……」

「HI!」他倆發夢也想不到條友竟然串到夠胆過來打招呼。「CHARLES, 亞 PAUL, 好嗎? 咁熱鬧呀。」

「哦! 係, 開完枱之嗎。」

「開枱? ……哦! 咁有閒情逸緻呀?」

「同你差唔多啦! 你果邊條女身裁幾正嗶, 得閒介紹嚟識呀。」

「噢, 果個? ……哦, ……你地自己都大把啦! 喂, 係咁先, 遲D搵你地飲茶。」

「好, 隨時都得。」

DAVID TSE 行開不夠兩步, 亞 PAUL 已經噴出一度刺耳的浪笑聲。「×那星, 扮嘢都搵對象呀。」

中環人

「唔好咁串, 因住佢整蠱你地。」李仔好心地插語。

「多×餘啦!」

「係呀, 驚佢開D藥俾我地食呀?」

「哈哈……」

「HELEN,」CHARLES 回到寫字樓, 經過 HELEN 枱便順口說: 「D QUOTATION 掂咗未?」

「掂晒啦。」

「咁就唔該晒。」

慌死唔係食晏時猛噴香水加料咩? 呢個女人都係唔好惹佢咁多嘞。CHARLES 幾乎想掩住個鼻。

「喂, 老細叫你入去囉。」

「係咩, 有杰嘢呀?」

「唔知囉。」

CHARLES 立刻去到自己枱前, 把幾疊文件插在公事包裏, 然後整整衣領, 行到老細房門口敲門。

「CHARLES, 你今朝去咗邊度?」

「哦……我去咗幾個新客度 COLD CALL。」

「有無結果?」

「無咁快嘅, 老細, ……有一兩個有D意思, 我後朝會再帶D SAMPLE 俾佢地睇, ……」

「近來D生意無七進展, 你要搵多D客路至得嘍……」

「係, 當然係啦, 而家生意係好難做, 間間都拉低價, 我已經盡咗好多力嘍老細, 今朝一連 CALL 咗五個客, 腳都軟。……」

老板面色不大妥。唔通有人打小報告, CHARLES 心裏開始有點懷疑, 無理由嘍, 老板點解突然咁樣望我呢? 唏! 梗係 LAWRENCE 條死仔……

「無嘢嘍。」

「哦, 好, 我出去打埋D QUOTATION。」

梗係 LAWRENCE 嘍! 自己博命, 重要害我, 打得佢少, 有機會一定……。

「呀, 重有件事我要話你知嘅。」

「哦, 七事呢?」CHARLES 很自然地緊張起來。

「唔, 施德靈個邊亞 DAVID TSE, 下個月開始過嚟我地度, 做 MARKETING MANAGER。你以前係唔係似識佢嘍?」

「吓?!」CHARLES 幾乎答不出聲: 「……識……識……, 見過吓啦。」